
ՄԻԶԱԶԳԱՅԻՆ ԳԻՏԱԺՈՂՈՎ. ՀԱՅՈՑ ՑԵՂԱՍՊԱՆՈՒԹՅՈՒՆ –
100. ՃԱՆԱԶՈՒՄԻՑ՝ ՀԱՏՈՒՑՈՒՄ

Գիտաժողովը մեկնարկեց հոկտեմբերի 15-ին, ՀՀ ԳԱԱ նախագահության նիստերի դահլիճում: Գիտաժողովը բացեց և նրա աշխատանքներին հաջողություն մաղթեց ՀՀ ԳԱԱ նախագահ, ակադեմիկոս Ռադիկ Մարտիրոսյանը:

Այնուհետև ընթերցվեց Հայաստանի Հանրապետության նախագահ Սերժ Սարգսյանի ողջույնի ուղերձը: Գիտաժողովի մասնակիցներին ներկայացվեցին Ամենայն Հայոց Կաթողիկոս Ն.Ս.Օ.Տ.Տ. Գաբեգին Բ-ի և Մեծի Տանն Կիլիկիո կաթողիկոս Արամ Ա-ի ողջույնի ուղերձները:

Ողջույնի խոսքերով հանդես եկան Երևանի պետական համալսարանի ռեկտոր, ՀՀ ԳԱԱ թղթակից անդամ Արամ Սիմոնյանը, ՀՀ ԳԱԱ արտասահմանյան անդամ, ԱՄՆ-ի Հայագետների ընկերակցության նախագահ Գևորգ Բարդակյանը և Վիկտոր Զախարովը (ՌԴ):

Լիագումար նիստում զեկուցումներով հանդես եկան ՀՀ ԳԱԱ պատմության ինստիտուտի տնօրեն, ԳԱԱ ակադեմիկոս Աշոտ Մելքոնյանը՝ «Հայոց ցեղասպանության միջազգային ճանաչման գործընթացը և հատուցման հիմնախնդիրը», Ռուսլան Շուլգան (Ռուսաստանի Դաշնություն)՝ «Проблемы устранения последствий Геноцида армян. От признания к требованиям компенсации», ՀՀ ԳԱԱ արևելագիտության ինստիտուտի տնօրեն, ԳԱԱ ակադեմիկոս Ռուբեն Սաֆրաստյանը՝ «Դիվանագիտությունն ընդդեմ ցեղասպանության. Անտանտի երեք երկրների 1915 թ. մայիսյան հայտարարագիրը (ակունքները և հետևանքները)», Էդիկ Մինասյանը՝ «Հայոց ցեղասպանության միջազգային ճանաչման նոր փուլի առանձնահատկությունները. դատապարտում և հատուցում», Michael Nesemann (Germany). The Vatican and the Armenian Genocide of 1915/1916.

Այնուհետև գիտաժողովը շարունակվեց տարբեր բաժանմունքներում.

Պատմություն. Պատմագրություն

Հայկական հարց. Աշխարհաքաղաքականություն
 Հայոց ցեղասպանության արտացոլումը արվեստում
 Տեսություն. Հիշողություն
 Հայոց ցեղասպանության արտացոլումը գրականության մեջ
 Ցեղասպանության հետևանքների վերացման և հատուցման
 իրավաքաղաքական ու սոցիալ-տնտեսական հիմնախնդիրը
 Մշակութային ցեղասպանություն՝ «Սպիտակ եղեռն»:

Նշենք, որ գիտաժողովի աշխատանքներին մասնակցում էին շուրջ 100 մասնագետներ Հայաստանից, Գերմանիայից, Ռուսաստանի Դաշնությունից, ԱՄՆ-ից, Ավստրիայից, Ավստրալիայից, Ուկրաինայից, Կանադայից, Լեհաստանից, Հունգարիայից և այլ երկրներից: Բաժանմունքներում լավեցին ավելի քան 100 զեկուցումներ և հաղորդումներ:

Գիտաժողովի մասնակիցները եղան Եղեռնի հուշահամալիրում, Հայոց ցեղասպանության թանգարան-ինստիտուտում, ներկա եղան իրենց պատվին տրված համերգին:

Հոկտեմբերի 16-ին, նույնպես լիազումար նիստում, ամփոփվեցին գիտաժողովի արդյունքները: Նշվեց, որ այս գիտաժողովը յուրովի ամփոփումն էր Եղեռնի 100-րդ տարելիցի միջոցառումների և իր բովանդակությամբ ու ասելիքով միահամուռ փաստեց, որ Հայոց եղեռնի միջազգային ճանաչման գործընթացին զուգընթաց պետք է վճռական քայլեր (իրավական, դիվանագիտական) ձեռնարկել հատուցման հիմնավոր և իրական ուղիների որոնման ու իրագործման համար:

«Գիտություն», հոկտեմբեր, -10, 2015